

Felis Kumpliaña

Ta remarkabel ku nos ta selebrá nasementu di Hesus pa vários motibu. 1) Poko di nos sa fecha di nasementu di nos lídernan awendia...ni nos ta selebr'é. Bo sa fecha di nasementu di nos gezaghèber, gobernadó, òf promé minister? Maske hopi pais no ta selebrá kumpliaña di nan lídernan, tòg nan—i nos—ta selebrá nasementu di Hesus!

2) Masha poko nos ta kòrda fecha di nasementu di un gran lídernan di historia...i kasi nunca nos ta selebr'é. Algun latino ta selebrá kumpliaña di Simon Bolivar (24 yùli) i merikanonan ta kòrda Martin Luther King (15 yanüari). Maske nos ta ignorá kumpliaña di gran lidernan históriko, nan ta kòrda Hesus Su nasementu.

3) Kasi nunca nos ta kòrda fecha di nasementu di hende ku a nase 500 aña pasá? Ma tòg, nos ta selebrá nasementu di Hesus mas ku 2000 aña pasá.

4) Ta remarkabel ku nos ta selebrá nasementu di Hesus maske e fecha ta desconosí. Ta sigur ku Hesus no a nase dia 25 di desèmber. Nos no sa si El a nase na aña 4 òf 3 B.C. Ta remarkabel ku nos tòg ta selebrá Su nasementu.

Pakiko bo ta selebra kumpliaña di sierto hende? Dikon bo ta selektivo... selebrando algun kumpliaña, ma otronan nò? Bo ta selebra kumpliaña di 1) hende ku bo ta stima, 2) hende importante pa bo, òf 3) hende konosí pa bo. Ta pesei, bo ta selebra kumpliaña di bo mama, ruman, amigu/a, èts. Bo no ta selebra hasimentu di aña di un persona ku bo no ta gusta, ku bo no konosé, òf ku no ta importábo.

Den pasado, nos a selebrá ora nos reina Juliana a kumpli ún aña mas di bida, dia 30 di aprel. Awendia, te ainda tin un dia liber riba e fecha ei. Ma poko hende na nos isla tin tantu apresio pa nos reina anterior ku nos ta kòrda mes ku e ta hasi aña e fecha ei. Mayoria hende ta selebrá Dia di Rincon.

Un otro motibu ku algun hende ta selebrá un aña mas di bida ta simpelmente pasobra nan ta gusta fiesta i selebrá. Nan ta presente unda ku tin salú ku bolo. I nan ta preferá algu mas stèrki, ku mas ambiente, ku mas músika bailabel.

Pakiko BO ta selebrá nasementu di Hesus? Pa hopi hende Pasku ta djis un ekskusa pa selebrá, fiesta, gosa, drecha i dòrna i fèrf kas, kumpra paña i asesorio nobo, èts. Un Pasku mainta tempran mi a sali fo'í kas. Tabatin un fiesta den bario. E promé palabranan ku mi a tende tabata: “Con quien me casare.” Klaramente e personanan na e fiesta aki tabata pensa di nan mes so. **Nan tabatin ni un tiki interesá den e persona di Hesus!**

Bo ta selebrá nasementu di Hesus djis pasobra bo ta gusta fiesta? Òf bo ta selebra pasobra bo ta stima Hesus i E ta importante pa bo?

E Beibi di Bètlehèm a bira adulto anto muri na bo lugá. “...e Yu di Hende...a bin...pa duna Su bida komo preis di reskate pa hopi” (Mateo 20:28). Si bo komprendé e echu ei, bo lo tin hopi apresio pa Su Persona i lo selebrá Pasku ku gratitut.

Un pareha tabata gosa nan fakansi na bich ora nan a tende stèm di un mucha muhé di 10 aña den laman gritando pa ousilio. Olanan tabata hib'é mas afó. Imediatamente e turista di 54 aña a batayá e olanan i a logra alkans'é. Ora e tabata tres'é bèk na tera, el a sinti un doló den su pechu. Pushando e yùfrou un biaha mas, el a bis'é pa hasi loke e por pa yega tera. I ku esei, e turista a desaparecé bou e olanan. Poko despues hende di reskate e mucha. Anto nan a haña kurpa di e turista sin bida. El a muri di un ataka di kurason, purbando pa salba bida di e mucha.

Si bo tabata e mucha, lo bo kòrda e fecha ei na un manera spesial tur aña? Sigur si! Riba Pasku, bo por kòrda Esun ku a nase pa duna Su bida pa bo. Esei ta motibu pa selebrá!